



АЗИЗ ҲАВОРИЙ ПАВЛУСНИНГ

# ТИТУСГА МАКТУБИ

## 1-БОБ

### Дуойи салом

<sup>1</sup>Худо танлаган кишиларнинг имонли бўлишлари ва хакикий диёнатни уқиб олишлари учун хизмат қилаётган Худонинг қули ва Исо Масихнинг хаворийси, Павлусдан — салом!

<sup>2</sup>Бизнинг имонимиз абадий ҳаётга умидворликдан иборатдир. Ёлғон гапирмайдиган Худо бу умид ҳақида азалий вақтларданок ваъда берган эди, <sup>3</sup>ҳозир эса, Ўзи хоҳлаган пайтда, каломини рўёбга чиқарди. Мен бўлсам, бу каломни эълон қилиш учун Қутқарувчимиз Худодан ваколат олдим. <sup>4</sup>Умумий имонимиз асосида хакикий фарзандим бўлган Титусга Отамиз Худодан ва Қутқарувчимиз Исо Масихдан меҳр-шафқат ва тинчлик тилайман.

### Титуснинг Критдаги фаолияти

<sup>5</sup> Сенга буюрганимдек, қолган ишларни битир, ҳар бир шаҳардаги имонлилар жамоати устидан оқсоқоллар тайин қил. Мана шунинг учун сени Крит оролида қолдирдим. <sup>6</sup> Сен тайин қиладиган одам беайб, якка хотинли, болалари эса имонли ва шалоклик ёки итоатсизлик айбидан холи бўлсин. <sup>7</sup> Чунки имонлилар жамоатининг нозири<sup>а</sup> Худо хонадонини бошқарувчи сифатида бенуқсон бўлиши керак. Ўзбошимча, ғазабли, шаробга мойил, тажанг, ғаразгўй бўлмасин. <sup>8</sup> Аксинча меҳмондўст, хайрихоҳ, вазмин, одил, пок кўнгилли ва нафсини тиядиган одам бўлсин. <sup>9</sup> Соғлом таълимот билан насихат қилишга ҳамда қаршилик қилувчиларнинг адабини беришга иқтидорли, ҳақиқат каломига ўргатилган ва унга қаттиқ риоя қиладиган киши бўлиши лозим.

<sup>10</sup> Хусусан суннатлилар<sup>б</sup> орасида ўзбилармон, қуруқ гап соғувчи алдамчилар кўп. <sup>11</sup> Уларнинг оғзини тўсиш керак. Улар жирканч манфаат йўлида лозим бўлмаган нарсаларни ўргатиб, бутун оилаларни бузиб кетмоқдалар. <sup>12</sup> Мана, улардан чиққан бир шоир: «Критийлар доимо ёлғончи, золим йирткичлар, еб-тўймас танбаллардир», деб айтган эди. <sup>13</sup> Бу гап тўғри. Улар соғлом имонни топсин ва бунинг учун сен уларни қатъий огохлантириб қўй. <sup>14</sup> Улар яна яҳудийларнинг афсоналарига ва ҳақиқатдан юз ўгирган одамларнинг гапларига кулоқ солмасинлар.

<sup>15</sup> Пок одамлар учун ҳамма нарса пок бўлур. Нопоку имонсизлар учун ҳеч бир пок нарса йўқ. Чунки уларнинг ақли ҳам, виждони ҳам нопоклашиб кетган. <sup>16</sup> Худони тан оламиз, дейдилар-у, ўз қилмишлари билан Уни инкор этадилар. Улар ҳар қандай хайрли ишга ярамас, бўйин эгмас, ифлос одамлардир.

---

<sup>а</sup> 1:7 НОЗИР: яна қаранг: 1-Тимўтий 3:1-7.

<sup>б</sup> 1:10 СУННАТЛИЛАР: Исо Масихга ишонган критлик яҳудийлар бўлса керак.

## 2-БОБ

### Соғлом таълимот тўғрисида

<sup>1</sup> Сенга келсак, соғлом таълимот асосида насихат қил.  
<sup>2</sup> Чоллар ўз ҳадини билувчи, хушёр, вазмин, соғлом имонли, меҳр-муҳаббатли ва сабр-тоқатли бўлсинлар. <sup>3</sup> Шунингдек, кампирлар ҳам ғийбат ва майхўрликка ружу қўймай, балки муқаддасликка мувофиқ, ҳар қандай хайрли ишда ибрат бўлиб турмуш кечирсинлар. <sup>4</sup> Кампирлар ёш хотинларга ҳам таълим-тарбия берсинлар. <sup>5</sup> Худонинг каломи қораланмаслиги учун, улар ўз эрлари ва болаларини севадиган, рўзғорга жонқуяр, вазмин, ифбатли, хушфеъл, эрларига бўйсунадиган бўлсинлар.

<sup>6</sup> Шунингдек, йигитларни ҳам босиқ бўлишга ундагин. <sup>7</sup> Ҳар бир хайрли ишда уларга ўрнак бўл. Таълим вақтида холис ва жиддий бўлиб гапир. <sup>8</sup> Сўзларинг аниқ ва ҳеч шубҳасиз бўлсин, токи рақибларинг биз ҳақимизда ёмон сўз айтолмай, уятга қолсинлар.

<sup>9</sup> Қулларга шундай насихат қилки, ўз хўжайинларига итоат этсинлар, уларни ҳар жиҳатдан мамнун қилсинлар, терслик қилмасинлар. <sup>10</sup> Ўғрилиқ қилмасинлар, балки очиқ кўнгил билан муомала қилиб, ҳар нарсада Қутқарувчимиз Худонинг таълимотини шарафласинлар.

<sup>11</sup> Чунки Қутқарувчимиз Худонинг инояти бутун одамларга яққол ошкор бўлди. <sup>12</sup> Бу иноят эса шуни ўргатадики, биз диёнатсизлик ва дунёвий орзу-эҳтиросларни рад этишимиз керак, бу дунёда Худодан қўрқиб, вазминлик ва такводорлик билан ҳаёт кечиришимиз лозим. <sup>13</sup> Шу орада буюк Худо ва Қутқарувчимиз Исо Масихнинг улуғворлик билан осмондан тушиб зоҳир бўлишига ва муборак умидимиз амалга ошишига кўз тикиб юрибмиз. <sup>14</sup> Масих бизни ҳар қандай гуноҳли ишлардан қутқариш учун, фақат Ўзига тегишли бўлган, хайрли ишларга ғайратли, пок бир уммат яратиш учун Ўзини биз учун фидо қилди.

<sup>15</sup> Буларни бутун бир салоҳият билан гапир, насихат қил, ошкор қил. Ҳеч ким сени камситмасин.

### 3-БОБ

#### Диёнат билан яшаш ҳақида

<sup>1</sup> Сен имонлиларга шуни эслатиб тургинки, улар ҳукмрон ҳокимиятга тўла итоаткорлик билан бўйсунсин, ҳар бир хайрли ишга тайёр бўлишсин. <sup>2</sup> Ҳеч кимни ёмонламасинлар. Уруш-қоқ бўлмай, барча инсонларга ювошлик ва мулойимлик билан муомала қилсинлар.

<sup>3</sup> Чунки бир вақтлар бизлар ҳам фаҳмсиз, итоатсиз, адашган одамлар эдик, ҳар хил эхтирос ва завқларга қул эдик, гина-кудурат ва бахилликка тўлган, бир-биримиздан нафратланадиган разил одамлар эдик. <sup>4</sup> Аммо Қутқарувчимиз Худо Ўзининг илтифот ва инсонпарварлигини очиқ кўрсатди. <sup>5</sup> Худо бизнинг қилган савобли ишларимиз туфайли эмас, балки Ўзининг раҳм-шафқати туфайли бизни қутқарди, гуноҳларимизни ювиб, бизни янгидан туғилтирди, Муқаддас Рух орқали бизга янги ҳаёт ато этди. <sup>6</sup> Қутқарувчимиз Исо Масиҳ шарофати билан Худо бизнинг устимизга мўл-кўл Муқаддас Рух ёғдирди. <sup>7</sup> Худо иноят қилиб, бизни оқлади ва абадий ҳаётга умидворлик билан қараган меросхўр ҳам қилди.

<sup>8</sup> Бу сўз барқарордир. Худога ишонганлар хайрли ишларга астойдил бел боғлаши учун, бу гапларни таъкидлаб уқтиришингни истайман. Бундай ҳатти-ҳаракат инсонларга маъқул ва фойдалидир. <sup>9</sup> Лекин бемаъни баҳслар, шажаралар, Таврот қонун-қоидалари ҳақида борадиган жанжалу музокаралардан қоч; булар фойдасиз ва беҳудадир.

<sup>10</sup> Бидъатчи одам бир-икки огоҳлантиришдан сўнг ҳақиқатга тушунмаса, у билан алоқани уз. <sup>11</sup> Ўзинг биласанки, бундай бузук одам кундан-кунга гуноҳига гуноҳ қўшиб, ўзини ўзи маҳкум этади.

#### Охириги истак ва саломлар

<sup>12</sup> Артемас ёки Тихикни сенинг ёнингга юборганимдан кейин, Никопол шаҳрига, менинг олдимга келишга ҳаракат қил. Чунки мен кишни шу ерда ўтказишга қарор қилдим. <sup>13</sup> Қонуншунос Зинас ва Аполлосни йўлга отлантираётганинда, уларнинг кам-кўстсиз жўнашларига эътибор қил.

<sup>14</sup> Бизнинг одамларимиз ҳам самарасиз кун кечирмасдан, зарурий эҳтиёжларини қондириш учун яхши ишлар қилишни ўргансинлар.

<sup>15</sup> Менинг ёнимдагиларнинг ҳаммаси сенга салом йўллаяптилар. Бизни севадиган имондошларга салом айтгин. Худонинг инояти ҳаммангизга ёр бўлсин. Омин.